

李文忠公全書

奏稿

李忠節公奏議卷七

奏議覆漕運鐵路摺

光緒二十一年三月初一日

奏爲遵

旨籌議漕運鐵路恭摺覆陳仰祈

聖鑒事竊臣於光

緒二十年十二月初二日承准軍機大臣字寄十一月二十九日

奉

上諭戶部議奏御史管廷獻奏請規復河運一摺著按照該

御史原奏四利十便及戶部所籌各節悉心會商妥議具奏等因

欽此伏查該御史原奏四利十便部議辯論周詳動中肯綮早邀

聖明洞鑒遵經分別咨商轉飭籌議去後茲據布政使湯聘珍

按察使松林鹽運使李希蓮濟東泰武臨道張上達會詳稱南路

運河向歸河臣經理北路運河向由東省承辦自陶城埠以北臨

清以南二百餘里之枯渠節節病淤借黃未可深恃專引積潦尤無把握如果改絃更張飛芻輓粟誠不敢執拘墟之見以鐵路爲必不可行惟細繹該御史原奏其所謂利與便未必盡利盡便所慮亦間有過慮即如所稱直隸湖北製造鐵軌等語究竟丈尺若干能否敷此二百餘里之用其長途轉運度地安置約須幾時平墊道路及路脚排椿俾足載重又須幾時縱可移緩就急而爲時已迫恐不及濟本年運務此其便未可深恃者一也又如所稱舟車剝卸需夫無業游民得資餬口等語竊恐此二百餘里之船變有業爲無業沿河挑淤抬淺剝重諸役素倚此以食力者不知凡幾生機頓失皆將變爲游民此其利未可深恃者一也又如所稱

百貨稅釐歲增巨款行旅便宜不涉重洋等語此二百餘里之間原爲北運河地面即使鐵路告成無慮阻滯而上游之南運河以至黃河南岸之十里鋪尙須開壩渡黃此壩啟閉有常每年自四月起至十一月止各湖開閘放水濟運餘月皆閉閘蓄水閉閘之時百貨來源已斷開放之際糧艘擁塞已多商情錙銖必較鐵路之便便止二百里海舶之便便輒千萬里恐未必舍彼趨此此其利未可深恃者又一也至所稱八可慮大要慮海道之阻耳糧運之少耳而未經慮及者猶有說焉造路全憑鐵軌直隸並未停廢湖北亦須自造鐵軌無從分撥必得籌款購鐵另行度地造軌運河兩岸堤埝曲窄不平礙難遷就又須購地安設稽諸成法其雙

軌之路佔地寬七丈連取土共佔地二十丈每一里路須佔地六畝工料地價併計造成鐵路一里約需萬金以北運河二百餘里計之共需銀二百餘萬兩如以十里鋪爲建路之始中隔黃河則必添建鐵橋方能利濟長約五六里測估工需又不下數十萬兩且黃流中洪湍激沙土鬆浮橋脚難以屹立即不惜工本恐非人力所能爲倘竟輟橋工則天險不能飛越仍須候汎渡黃難避風濤之險總之工鉅費繁目前艱於集事值此海防喫緊庫款羅掘一空竭蹶萬分慮難兼顧等情詳請覆 奏前來臣博採周諮核與該司道等所議相符除其餘應議各節另由各省督撫臣會商議 奏外所有遵 旨籌議漕運鐵路緣由理合恭摺覆陳伏乞

皇上聖鑒謹 奏 光緒二十一年三月十九日奉 硃批知道
了欽此

奏推廣河運事宜三條片 光緒二十一年三月初一日

再臣維鐵路急切難行漕運關繫匪淺與其紛更而鮮濟莫如籌畫以從長茲於墨守之中寓以變通之道謹將推廣河運事宜分條臚列爲我 皇上敬陳之一江浙漕糧宜酌量增加也查每糧船一隻照章附剝船二划船一共祇應載糧米二百石實可共載一千石船戶利其能夾帶貨物偷漏稅釐船價不必昂而爭先受僱今請多加船價嚴定夾帶貨物之禁每船責令實裝糧米六百石船力仍寬綽有餘共船九百餘隻每年計可運糧六十萬石河

道不必改船數不必增而運糧可增兩倍且糧船不夾帶貨物稅
釐必益加多以各路徵收之稅釐抵糧船之加價亦可有贏無絀
一河南糧石宜改運本色也查河南糧艘沿衛河而北可由道口
徑至通州順水行舟最易爲力應令每年起運四十萬石或以折
色改徵或將折色購運若該省額徵漕糧不敷此數即以他省折
色之銀解往道口等處買補雖豫省粳粳無多而小米爲用亦廣
時勢若此即豫省折色已久亦應變計共濟艱難一轉移間較江
蘇河運漕糧又可歲加兩倍矣一山東運河宜加意講求也查陶
城埠舊攔黃壩原寬八丈嗣以大汎掣溜縮成五丈旣而竟塞此
壩於下游相去八九十丈別築新壩以避洪流之險上年又塞新

壩仍復舊壩五丈之制此攔黃壩新舊寬窄之原委也上年黃汎極小不敷浮送東昌府知府洪用舟旣復舊壩以迎黃溜又多方導引積潦始克濟事積潦固未可常恃而黃汎大小亦復歲有不
同擬請先將河身大加挑濬新舊兩壩並行修築備用舊壩仍寬八丈新壩可寬五丈水大則啟新壩水小則啟舊壩漕船均可暢行無阻以上三條如能行之有效不必遽興鐵路而漕運日增可以濟海運之窮據藩司湯聘珍等議詳前來理合附片具陳是否有當伏乞 聖鑒訓示謹 奏 光緒二十一年三月十九日奉
硃批戶部議奏欽此

奏順天購糧平糶經過東省免征稅釐片

光緒二十一年三月初一日

再前准戶部咨御史管廷獻以近畿糧價騰湧兵民艱食奏奉

諭旨遣員招商購糧運至天津山海關一帶平糶豁免稅釐自應
欽遵辦理惟查山東常年產糧不敷內地食用沿海各屬向賴奉
天糧食接濟自倭人開釁以來海艘不通糧販不至各路防營雲
集糧價日昂民食兵糈在在均虞缺乏臣已 奏明派員由兗沂

各府及江蘇河南邊境分投購糧設局轉運以資軍食現在增兵
之多需餉之繁幾與奉天情形相埒若再籌款遣員採買遠道轉
輸實屬力難兼顧然奉省爲根本重地大局攸關亦當廣爲設法
期於商販流通上年十二月至本年二月迭准順天府府尹臣咨
會招商赴河南道口等處採買米麥雜糧發過十四起護照六百

一十八張共計購糧一百二十八萬五千石俱由衛河運至通州入京辦理平糶法至善數至鉅也似此源源濟運正與該御史所奏辦法相同顧法可因人以立而人每緣法爲奸蓋糧商包攬影射是其慣技亦有因糧數過多本商挾貲不贍難免將護照出售與人輾轉增費則糧價仍未必果抑且經過關卡有無夾帶私貨例應查驗或以石數不符或以限期未註又不免因此阻滯則糧運亦未必果暢值此河凍正開青黃不接之際雖稅釐關係餉源而畿疆需糧孔急關係尤重不得不因時變通招徠廣運擬自本年二月爲始至前五月底止凡遇糧船經過東省各關卡查驗護照載明石數不論有無限期一律加戳免征釐稅放行並嚴禁胥

役需索留難仍應核計免征稅釐之多寡歸於 奏銷案內抵算分數之盈絀以符定章如此經權互用則商販不招而自至糧船無阻而暢行糧聚則價必自平民食兵食皆有賴矣據布政使湯聘珍並善後釐稅局司道會詳請 奏前來除咨部查照外理合附片具陳伏乞 聖鑒謹 奏 光緒二十一年三月十九日奉 硃批戶部知道欽此

奏糧船護照逾限照常完稅片 光緒二十一年三月初一日再山東稅釐向以糧食爲大宗歲解固本兵餉專賴各卡釐金協撥奉天吉林俸餉專賴臨清關稅一自各路購糧平糶稅釐並免餉源因而短絀非稽征之不力也惟當此兵民艱食急求平價不

得不酌量變通自本年二月起至前五月底止四個月以內護照之有無限期姑置弗論迨四個月以外仍須察看情形認真稽查其稽查之法全在護照載有限期自何日給照至何日繳銷赴何處採購歸何處平糶均應於照內註明以憑驗放如驗無限期及逾限未繳者照常完納稅釐庶糧商不致弊混而餉源可免枯竭矣抑臣更有慮者前奉 諭旨飭禁內地米糧一概不准出洋仰見 聖謨廣運防範綦嚴現查衛河一帶糧船紛紛北行駛過臨關直抵天津四通八達萬一奸商盜運出洋適足以濟寇糧亟應從嚴稽察以塞漏卮除咨直隸督臣查禁外謹附片陳明伏乞

聖鑒謹

奏

光緒二十一年三月十九日奉

硃批戶部知道

欽此

奏謝天恩摺 光緒二十一年三月初二日

奏爲恭謝 天恩仰祈 聖鑒事竊臣於光緒二十年十二月二十八日欽奉 電旨李鴻章李秉衡各電奏倭兵登岸榮成失守覽奏殊深憤懣東省兵力較單致有疏失李秉衡自請議處著加恩寬免等因欽此又准吏部咨光緒二十一年正月初十日軍機大臣面奉 諭旨李秉衡電奏威海失守請將帶兵各員嚴議並自請嚴議等語李秉衡調度失宜究因兵單所致著加恩改爲交部議處等因欽此又准吏部咨光緒二十一年正月二十七日軍機大臣面奉 諭旨李秉衡奏文登縣甯海州先後失陷請將地

方文武各官革職留營効力並自請嚴議一摺李秉衡著加恩改爲交部議處等因欽此疊將感悚下忱於電奏內附陳在案嗣經吏部按照本例兩案各議以降二級留任不准抵銷先後奉 旨

允准於二月初七二十八等日准吏部咨行到臣欽誦之下慚悚交縈伏念臣未習韜鈴謬膺軍旅愧無克敵擒渠之略時切力小任重之虞乃蒙 聖德如天 溫綸逮下不責臣之竭蹶而有殫竭心力之 褒復鑒臣之迂疏而有益矢公忠之 訓雖失律屢煩 睿慮而 加恩迭荷 優容凡茲非分之邀益切返躬之疚臣惟有拊循將士激勵戎行共矢臥薪嘗膽之忱以作敵愾同仇之氣冀得布昭 聖武綏靖海疆仰答 高厚生成於萬一所有

微臣感激下忱謹繕摺叩謝 天恩伏乞 皇上聖鑒謹 奏

光緒二十一年三月十九日奉 硃批知道了欽此

奏藩司湯聘珍請赴前敵代奏摺

光緒二十一年三月初三日

奏爲據情代 奏仰祈 聖鑒事竊據布政使湯聘珍稟稱本年

正月初六日奉電開准總署電正月初四日奉 旨本日據李秉

衡奏稱東省海防陸路非添募三十營不可現在東省陸防需兵

甚急著照所請趕緊陸續招募藩司湯聘珍曉暢營務法越之役

頗著戰績現在募勇事宜即令就近經理俟募有成數或即飭令

湯聘珍統帶及屆時如何分防再由李秉衡奏明辦理欽此希即

欽遵舉辦並欽遵統領等因其時適古州鎮丁槐奉 旨援東聘

珍舊與同親矢石深知其謀勇兼優乃商請添募數營並札飭副將陳大勝添募三營均經隨時電稟並欽遵照料在案聘珍以一布衣位至藩司當海疆多事之秋正提劍酬恩之日矧此番跪聆電旨尤令悚惶感泣不敢一刻自安特彼時東路正緊榮文甯威不守後路空虛人心惶動省城根本萬分喫重聘珍深籌積慮不敢虛擁統領之號而仍自深居省城尤不敢博奮赴前敵之名而輕離根本重地是以祇能在省欽遵照料今者榮文甯威次第收復東路鬆西北緊矣方東路之緊也慮寇直趨省城以梗南北之氣則不敢一日離省城及西北之緊也又慮寇由武定北犯以增畿輔之憂則不敢一日忘前敵再四思維惟有仰懇察核或

將藩司篆務另行委署俾聘珍得以躬赴前敵專意兵事稍圖報稱實爲此生之幸儻以後路軍餉軍械轉運等事均關重要必責聘珍綜理不令躬赴前敵則聘珍亦當祇遵惟此不敢憚險不敢憚勞之下忱應請據情奏明以紓 聖主採及葑菲委任之至意等情稟請代 奏前來理合據情代 奏應否 敕令湯聘珍躬赴前敵抑或仍留後路綜理餉械轉運之處恭候 聖裁謹繕摺具 奏伏乞 皇上聖鑒訓示謹 奏 光緒二十一年三月二十日奉 硃批另有旨欽此

奏遵旨詳查丁汝昌等死事情形摺

光緒二十一年三月初三日

奏爲遵

旨詳查丁汝昌等死事情形恭摺覆陳仰祈 聖鑒事